

六經同卷

佛說三摩竭經

佛說婆羅門避死經

食施獲五福報經

頻毗娑羅王詣佛供養經

善八

佛說長者子六過出家經

佛說鶩崛摩經

善

佛說三摩竭經

善八

吳沙門竺律炎譯

聞如是一時佛在舍衛國祇樹給孤獨園與
千二百五十比丘五百菩薩俱帝王人民及
諸天龍鬼神無復央數爾時有難國王名分
陂檀不信佛法但好外道日於宮中飯諸尼
捷萬餘人難國王常喜貢高自用智慧無雙
以鐵鑠其腹常恐智慧從腹橫出王欲為其
太子娶婦即問左右羣臣天下寧有智慧如
我者不若有者我欲為子娶其女大臣便受

王教即徧至國中求索了無有如王亦自知國中無有即更遣使者行到他國求索智士女爾時使者即受王教便至舍衛國使者便問國中人民是國中寧有好道賢者不乎人答言有使者言姓字何等人報言字爲佛使者言佛寧有女無人言佛者道人也無有女使者言次復有誰人答言復有人字阿難邠坻大賢善好道有好女國中第一使者言何用爲第一國中人言曾與太子祇共請買園田八十頃持上佛復以象負輦黃金數千萬

億持雇園田不貪重寶但念爲善耳使者聞國中人言大歡喜自知以得消息即還本國白王言廼舍衛國中有賢善者大好道字阿難邠坻難國王聞使者言便作書即遣太子與羣臣百官嚴駕載珍寶俱相隨到舍衛國止頓太子著城外使人便入城至阿難邠坻舍時守門者便入白阿難邠坻外有使者來阿難邠坻即自出應門見使者黑醜如鬼阿難邠坻大驚言汝何等人乎即答言我是難國王使者阿難邠坻言卿來欲何等求索使

者言我來宣傳教命難國王雖不相見遙相
愛敬人每往來歌歎卿功德無有量聞君賢
善大好道有女故來欲爲太子求君女王亦
自有書相聞阿難邠坻即欲罵之便自忍而
不言便呼前共坐相問訊談語使者便以書
示之阿難邠坻即讀書訖竟答使者言我有
大人當往報之若聽我者我當還語卿消息
便留坐使者阿難邠坻便到佛所即前爲佛
作禮却長跪叉手白佛言今難國王遣使者
來到我家其人狀類黑如鬼辭言欲爲王太

子求我女三摩竭今當云何佛言與之阿難
邠坻言使者黑如鬼其王太子當何類我復
曾從佛聞難國王但事諸尼捷裸形無有衣
被狀類醜黑驚怖我女佛言不也與之當知
是因緣三摩竭應當於裸形國度脫八萬人
阿難邠坻不敢復問佛心懷恨意即還歸謂
使者言卿奉王教命故從遠來求索我女大
善當相與使者聞阿難邠坻言即還到城外
至太子所便與太子俱相隨來到阿難邠坻
舍即從車上下金銀及禮聘與阿難邠坻便

共請人客飲食相娛樂七日訖竟阿難卻抵遣送三摩竭奴婢衣服及與珍寶無復央數太子便載三摩竭去還歸本國爾時難國王見子婦來歸即大歡喜便請其師尼捷若陀弗及萬二千弟子悉入宮飯之難國王夫人及太子悉下飯具爾時呼三摩竭來出欲令下飯分共禮諸師三摩竭適至第三門中遙見諸尼捷悉羅坐裸形無有衣被三摩竭即大驚是為狗畜生無有異便兩手覆面遙唾之即還入室不肯復出諸尼捷皆瞋恚三摩

竭即告王言從何得此榮惑不吉利之人在王宮促遣令去若不遣去者當壞敗王國中諸尼捷不肯復飯食即欲起去王便辭謝諸師我當為大師遣去明日不復令現於宮中諸尼捷及飯食訖便去即日太子自往至三摩竭所三摩竭時大瞋恚教婢令閉門如是四五日太子不敢復往夫人即問太子何故不往太子默聲不言夫人已知之即自往到三摩竭所我為子娶若今當承事我子何故折辱我子三摩竭答言夫人子所事師及國

中人民皆如狗畜生無有異夫人聞之大慚
愧即還白王言大王自用道智無雙國中無
有可王意者王廼勞羣臣八千里求婦今婦
無所畏難折辱我子復面罵我言比狗畜生
王聞夫人言即自往到三摩竭所爾時三摩
竭大憍慢不肯出為王作禮王即遙問三摩
竭我行八千里娶若以賢善故若聞者既辱
我師今復面罵夫人及太子豈有不可乎三
摩竭報言然大王師及夫人太子并其國中
人民皆如狗畜生無異王即驚言是小女子

今折辱我如是我恐智從腹中橫出以鐵鏃
我腹我日飯諸道士萬餘人誰能及我者今
汝交面相罵三摩竭言王國中人民所事師
常無有衣裳裸形相視當有何等道設使有
道尚不足以貴何況無道大王日雖飯是輩
萬餘人者皆是我所不恭敬輩常唾賤者爾
時難國王太窮即自思惟當共誰議是事即
自往到尼捷若陀弗所前為師作禮白言我
娶婦已於舍衛國得婦聞者無狀既折辱大
師今復憍慢面罵我及夫人太子比狗畜生

雖是婦不以婦禮事我今當云何師告王復
往問之言汝國中人民所事何如我國中人
民所事知何等言王往慎勿得瞋怒徐問之
自當有語王即受教如師所言便到三摩竭
所問言汝國中人民所事何用勝我國中人
民所事三摩竭言我國中人民所事最尊男
女皆有衣裳尊卑異路身體不相見現有大
小名佛教授數千億萬人皆令得度世泥洹
道入火不燒入水不溺能典攬三千大千日
月萬二千億天地變化入無間出無孔知當

來過去今現在事身有三十二相八十種好
道德通達諸天帝王人民雜會稽首來謁王
聞三摩竭語即大踊躍歡喜爾時難國王告
三摩竭言汝所事佛寧可得見不三摩竭言
我能爲大王遙請之即可致王言大善廼相
去八千里請佛當云何三摩竭言不須大王
遣人請但當至意遙燒香請也佛神通照知
人心中所念王夫人及太子皆隨我後三摩
竭即自上高臺上整服便向舍衛國長跪燒
香持頭面著地作禮言今難國王不知天下

有佛當用一切人民故哀悲諸勤苦願佛明
旦與諸比丘僧勞屈尊神來到難國王所飯
言適竟香煙便繞佛所遶佛三帀於佛上化
作香蓋佛時適爲無數千人說法爾時阿難
前長跪叉手白佛言是何等感應迺爾願佛
解說其意佛告阿難難國王及三摩竭明旦
當請佛及諸比丘僧三摩竭有至心欲令難
國人民悉捨邪見令向正道香來至此請佛
爾時即告摩訶目犍連勅諸比丘僧明旦當
到難國三摩竭所食摩訶目連受佛教即宣

語諸比丘明日當就請勿得他餘行於是三
摩竭皆令王夫人太子及諸姝女齋戒燒香
布坐席設飯食具悉辦三摩竭知佛當來與
王夫人太子姝女及諸尼捷共住中庭三摩
竭告王夫人太子皆隨我後今諸羅漢當先
來至佛最在後卿曹慎莫驚怖隨我所爲三
摩竭於是復長跪燒香言飯具已辦願佛用
時佛知三摩竭心所念即告諸比丘今日當
到難國食汝曹各以道變化自在所爲諸比
丘即受教中有化作龍虎鳥鳳凰孔雀牛鵝

鵠百鳥梟獸交露帳者諸衆僧悉在其中坐
各各皆不同爾時佛自坐師子交露帳中即
與千二百五十比丘五百菩薩諸天神龍
俱從虛空中神足飛行適至難國佛便放光
明天地大震動諸羅漢菩薩各悉作變化先
來下難國人民見此變化皆大驚怖王問三
摩竭言是佛不也答言非佛三摩竭告王勿
恐是諸弟子也佛最在後身中有三十二相
八十種好須臾之間佛俱從上來下釋梵四
天王在前導諸天鼓琴作其倡妓而樂佛三

摩竭與王夫人太子即持華香迎佛前爲佛
作禮便相將入宮即就坐諸菩薩阿羅漢皆
前坐大小相次三摩竭即令王夫人太子前
行澡水便下飯食具國中人民來觀者甚衆
多王令大臣閉宮門人民見王閉宮門大瞋
恚王所各持斧欲破宮門佛遙知之言我所
行化皆欲令作善今難國人民皆來觀王而
閉宮門也佛爾時欲令一切人等見佛即使
宮門牆壁悉化作水精色內外相見難國人
民見佛及諸菩薩羅漢皆大歡喜爾時佛有

一羅漢名賓頭盧時坐山上忽忘至難國賓頭盧坐來久適欲以鍼縷縫衣以鍼刺地縷與衣相連是時佛已應難國王宮中坐已賓頭盧即以神足飛行至難國山便隨賓頭盧後爾時國中有一女人懷軀見山來正黑恐墮其上便大惶怖即墮軀佛以遙知之即令摩訶目連以神足飛行迎問賓頭盧汝後何等賓頭盧即還顧見山以手攬山擲故處八千里爾時賓頭盧即到前爲佛作禮却坐佛告賓頭盧我教天下人欲令悉度世今汝旣

失期復殺一人人命至重是我道所不喜汝從今已後不得復隨我食及與衆會若當留住後須彌勒佛出廼般泥洹去身賓頭盧聞佛說如是即默然憂愁復自悔貢食訖便起前爲作禮及諸菩薩阿羅漢共辭便入山中爾時難國王師尼捷若陀弗白佛言寧可共誦道不若不如者當投著井中佛言大善不須多言三問不如者當投著井中尼捷若陀弗言大善佛即問若誦經時云何尼捷若陀弗言我誦經時匍匐而行是爲狗狗迺匍匐

而行尼捷若陀弗便不如佛諸弟子皆瞋餘語爲賜那正說是事也悉還恚其師所取師欲投著井中師即大惶怖以兩手拒地不肯入井佛言置之爾時中庭自然有大火出其焰上詣第七梵天其火中自然有千葉蓮華華上有五百梵天皆叉手長跪問佛飯何等善八人得福多者飯何等八人得福少者佛答梵天言譬如以五種穀散著火中爲生不梵天言不生佛言難國王前後所飯諸尼捷譬如五穀著火中終不復生今日飯佛及諸菩薩羅

漢得福多無有量譬如人有好地有好種天復時雨何憂不生今佛是一切人福田隨人所種必得其願愚癡人喜教他爲外道是人命盡皆當墮太山地獄中甚勤苦悔無所復及前人坐之未出後人復教作之世間人愚癡但更相欺調是故不知真道若有黠人當學正道其道不生不老不病不死是爲泥洹大道世間凡有九十六種道皆不及佛道佛言以一天下樹枝及與鳥毛作筆書佛經樹枝鳥毛悉皆可盡佛智不可盡大如須彌山

墨磨研四海水點筆須彌山墨四海水皆可
盡佛智終不可盡五百梵天聞佛語應時舉
聲言善哉審如佛所言於是五百梵天忽然

不見爾時難國王眷屬三百人千二百婢女
五百大臣見佛變化皆踊躍歡喜悉發阿耨

喜人

九

多羅三耶三苦心時二千婆羅門即除鬚髮
皆作比丘應時悉得阿羅漢道萬二千尼捷
應時悉解脫中有得須陀洹道者有得斯陀
含道者有得阿那含道者國中人民復有六
萬四千人皆信向佛法即受五戒悉為優婆

塞佛說經已即與諸菩薩阿羅漢俱現神足
飛去爾時難國王及夫人太子羣臣人民皆
大歡喜悉持頭著地遙為佛作禮

佛說三摩竭經

佛說婆羅門避死經

後漢三藏法師安世高譯

聞如是一時婆伽婆在舍衛城祇樹給孤獨
園爾時世尊告諸比丘昔有四婆羅門仙人
精進修善法五通常恐畏死時四婆羅門仙